

Rezia veterana Friburg/Grischun

Curri e passà inqual chaussa 2015

■ **(anr/gc) Mintgamai per l'entschatta da la primavera convotgescha la premurada presidenta da la Rezia veterana (ils anteriurs da la Corporaziun academica Rezia a Friburg), Barbla Etter, la radunanza annuala e la sentupada – pil pli a Cuira.** Uschia èsi era stà il venderdi passà nua che l'inscunter ha entschavì cun in eveniment fitg dulutsch, numnadamain tar ina visita a l'enconuschenta pasternaria-conditoria Merz. Là è vegnì prendì invista da la producziun da tschigulatta en l'Africa e da tantas delicatessas che sa laschan far ordlonder. Mintgin ha schizunt sez pudì «fabritgar» ina tschigulatta. Igl è stà tant interessant sco gustus.

Revista

Tar l'activitad da l'onn passà ha la parsura menziunà il di da famiglia a Langnau (Turitg), il pelegrinadi da la Rezia si Ziteil cun l'avat *Vigeli Monn*, Mustér, sco predicatur e celebrant. – Da la Festa centrala da la Societad da students svizzers (SSS)/StV, a Soloturn, han plirs commembers prendì part, medemamain da la canorta per la fin da l'onn a Cuira.

Memento

Da tschintg commembers ha la Rezia stuì prender cumià l'onn passà per adina: Modest Cahannes (1935–2015); Toni Berther (1927–2015); Theo Portmann (1942–2015); Walter Wittmann (1935–2016), stà l'emprim senior da la

Rezia a Friburg, e da Bruno Tuor (1934–2016).

Mutaziuns e conferma

Ignaz Arpagaus è daventà 2015 veteran da la SSS (50 onns commember). – Depplorablament han tschintg commembers stuì vegnir exlaus, nunavend ademplì l'obligaziun finanziaria vers l'uniun. – Da preschent ha la Rezia veterana 111 commembers. La cassiera ha preschentà in bun quint. Fitg legravel è che l'entira activa suprastanza stat a disposiziun per ina ulteriura perioda d'uffizi. Ins è stà fitg engraziavel persunter.

175 onns SSS – 60 onns Rezia

Il program per 2016 è sumegliant a quel dals onns passads. Tar la Festa centrala da la SSS a Sviz da quest onn vegn festivà ils 175 onns da quella, vegnida fundada là 1841. Per quest giubileum vegn edì in tom supplementar (per ils davos 25 onns dal StV) cun era resguardar la Ruman-tschia. Per 150 onns (1991) è cumpari – sut la redacziun dad *Urs Altermatt* – ina gronda scartira quadrilingua per quella societad giubilara.

2017 survegn la Rezia 60 onns. Ins ha previs in inscunter giubilar a la fin da l'onn 2017 a Friburg. Era vai alur per dar sustegn a la Rezia activa che ha dapi in temp paucs commembers, ma ch'ins vul mintgacas rinforzar – sco dal reminent era l'Uniun chantunala da la SSS en il Grischun.